

«Deplen» og «Kristi-Olga-huset» i Syvde.



I protokollen etter fotograf Johannes Sponland er det notert at dette bildet er bestilt av Knut B. Myklebust, og Fylkesfotoarkivet har notert at det er eit eldre ektepar, atelierbilde.


Dette er Knut Bentsson Oseberg Myklebust, som var fødd i 1854 i Oseberget (gbnr. 89.5) i Syvde og døde i 1943, sist busett i Syvde sentrum. Kona er Anne Eriksd. Takset (98.8), og dei var gifte i 1878. Knut var brukar i Oseberget frå 1873 til 1894, og då dette bildet var teke i 1912, budde paret på eit tidlegare plassebruk: Bulegene, gbnr. 89.2, på garden Myklebust i Syvde. Dei hadde flytta dit i 1894. Plassen i Bulegene vart truleg kalla Depelen eller Deplane i eldre tid, og Knut vart iallfall til dagleg kalla «Deplen».

Dette «daglegnamnet» vart også brukt på familiemedlemmane. Vi har for eksempel fleire bilde frå 1900-talet som Eline Ulvestad namnsette i 1970-åra, der Knut si yngste dotter, Karoline, vart namngitt som «Deple-Kalla», og broren henna, Ansgar vart «DepleAnsgar».

Knut og Anne hadde borna **Edvard, f. 1879, Rasmine, f. 1881, Anne, f. 1884, Karen, f. 1887, Karoline, f. 1890**, g.m. Hans K. Urke frå Hjørundfjorden, **Ansgar, f. 1893**, utvandra til USA. Ingen av dei busette seg i Syvde. Yngste dottera Karoline gifte seg i 1917 med Hans K. Urke og flytta til Urke, Hans si heimbygd i Hjørundfjorden. Eit par år seinare selde Knut og Anne bruket sitt i Bulegene, og tok med seg det vesle bustadhuset og flytta til Urke, men etter kort tid der, tok dei ned huset og flytta tilbake til Syvde. I den såkalla Panteboka (eit slags eigedoms- og avtaleregister m.m.) er det ført inn under gards og bruksnummer 88.15: «Bygselkontrakt fra Lars K. Grebstad til Knut Bentsen Myklebust og hustru paa et stk. av d.e. på livstid mot bygsel Kr. 50,00 og aarlig avgift Kr. 5,00, dat. 3/9 1921, tgl. 8/7/ 1922.». Denne parsellen ligg i Syvde sentrum, og der fekk dei sette opp huset igjen.

Anne døde i 1932, og Knut vart åleine fram til han døde i løpet av 1943. Det siste året selde Knut Bentsson huset sitt til Ivar S. Myklebust og Olga Larsd. Grebstad Myklebust, og då Knut døde, vart parsellen med huset skilt ut frå Kristi-gardsjorda og fekk eige gards- og bruks-nummer, gbnr. 88.51 Ivarsbu. Huset står framleis i Syvde sentrum.


På bildet under ser vi huset til Anne og Knut B. Myklebust som dei altså flytta med seg




til og frå Hjørundfjorden. Det ligg nesten i venstre bildekant til høgre bak Nordals-nausta, og har torvtak med eit par tømmer-stokkar frå mønet og ned til rafta. Dette er eit utsnitt av eit Storegjerdebilde i Syvde-samlinga, teke rundt 1930.

I min oppvekst vart dette huset i 1950- og 60-åra ikkje kalla noko anna enn Kristi-Olga-huset, for Olga sin mann, Ivar Severinsson Mykle-bust (Garstøyl-Iver) døde alt i 1949, så han hadde dei fleste av oss unge ikkje noko klart minne om.

For nokre år sidan dukka det opp eit privat album der det m.a. fanst eit bilde som er av Knut B. Myklebust, som då var granne med kjøpmann Almklov og familien hans i Vik. Bildet kan vere teke ein gong mellom 1930 og 1940, og Knut står her ovanfor huset som kjøpmann Andreas Almklov hadde bygt tidleg på 1900-talet, der Almklov også hadde butikk og bakeri. I bakgrunnen ser vi fronten på Syvde-kyrkja.



Under andre verdskrigen måtte folk ha legitimasjonskort, også kalla grensebuarbevis, der det var bilde av personane på framsida av kortet, og eigenhending underskrift på baksida. Mange av desse er no skanna, og er tilgjengelege i Fylkesfotoarkivet, og der finn vi også Knut sitt kort, som var utskrive i 1941, to år før han døde. Det er ikkje usannsynleg at dette kortet nedanfor kan ha det siste bildet som var teke av «Deplen».

Etternavn: <u>Myklebust</u>	(Foto.)	Stilling: <u>Forsjont</u>
Fornavn: <u>Knut B.</u>		Adresse: <u>Syde</u>
Fødested: <u>Syde</u>		Navnetrekk: <u>Knut B. Myklebust</u>
Født: <u>24/2 - 1854</u>		Legitimasjonskort utstedt den <u>24/3 41</u>
Statsborgerlige forhold: <u>st.</u>		på grunnlag av følgende legitimasjoner
Nr. <u>303</u>		

I dag står det vesle huset, der Knut og kona Anne budde sine siste levedagar, i sentrum i Syvde, nær forsamlingshuset Fredtun, som eit minne frå ei anna tid.

